

JEREBU

Penyelesaian menerusi semangat setia kawan negara ASEAN

S oalan yang sering kedengaran pada masa ini ialah, bilakah jerebu akan berakhir. Fenomena jerebu berlaku saban tahun. Ia berulang setiap tahun akibat pembakaran hutan yang tidak terkawal dan biasanya berlaku pada musim kering yang panjang antara Jun hingga Ogos dan boleh berlarutan sehingga Oktober, tertakluk kepada perubahan cuaca.

Jerebu sewajarnya dilihat sebagai masalah bersama memandangkan sifatnya yang mampu merentas sempadan. Mana-mana negara tidak sepatutnya menuding jari ke negara lain dalam mencari titik penyelesaiannya. Sikap ini sememangnya akan memburukkan lagi keadaan. Adalah disarankan supaya negara terbabit duduk semeja berbincang dengan bijaksana, mencari jalan penyelesaian terbaik tanpa ada sentimen tuduh menuduh dan menyalahkan antara satu sama lain.

Kemampuan negara terbabit menangani permasalahan secara berhemah dan bijak sememangnya memberi impak yang besar terutama kepada negara rantau ASEAN, yang masyarakatnya ter-

kenal dengan adab budaya unik, sikap toleransi tinggi dan mempunyai satu ikatan atau perasaan istimewa antara satu sama lain yang dilihat mampu menanganinya secara berhemah.

Penyelesaian henti masalah saban tahun berulang

Wajarlah negara terbabit menggunakan tiket ASEAN, dapat membuang ego masing-masing untuk sama-sama membantu mencari penyelesaian terbaik ba-

gi meredakan, malah menghentikan permasalahan yang saban tahun berulang.

Islam adalah agama keamanan dan menggalakkan persaudaraan tanpa mengira bangsa, agama, dan warna kulit. Sememangnya jiran adalah orang paling rapat selepas keluarga, yang patut dihormati dan berhak mendapat layanan istimewa.

Firman Allah SWT yang bermaksud: "*Hendaklah kamu berbuat baik kepada kedua ibu bapa, kaum kerabat, anak-anak yatim, orang-orang miskin dan jiran tetangga yang dekat dan yang jauh*" (An-Nisaa'[4]:36).

Daripada Aisyah RA, Rasulullah SAW bersabda: "*Jibril sentiasa menasihatkan kepadaku supaya berbuat baik kepada jiran sehingga aku merasakan jiran itu kerabat ku.*" Malah, jiran jugalah yang menjadi faktor utama menentukan keharmonian dan kebahagiaan kehidupan tetangganya. Daripada Abu Hurairah RA: Rasulullah SAW bersabda: "*Tidak masuk syurga seseorang yang jirannya tidak merasa aman daripada kejahatannya.*"

Oleh itu, negara terbabit wajar mempraktikkan konsep kejira-

nan yang disarankan Islam dengan bersulamkan semangat setia kawan yang kuat. Bantuan sewajarnya patut dihulur untuk mengurangkan beban dan masalah jiran tanpa ada perasaan mengharap balasan.

Bantuan ini pula patut diterima dengan hati terbuka dan seadanya. Toleransi yang tinggi patut sentiasa diamalkan sesama negara yang berjiran. Dari Abu Hurairah RA: Rasulullah SAW bersabda: "*Janganlah sekali-kali seorang daripada kamu melarang jirannya untuk menancapkan kayu di temboknya.*"

Peluang erat hubungan, fahami keadaan

Inilah masanya negara terbabit sepatutnya mengambil peluang mengeratkan lagi hubungan antarabangsa. Gunakan situasi ini sebagai pengerat hubungan untuk cuba memahami keadaan dan situasi masing-masing.

Jika sebelum ini isu ini dianggap biasa, maka sudah tiba masanya ia diberi perhatian sewajarnya oleh negara ASEAN, khususnya negara terbabit. Perbincangan dan cara penyelesaian boleh dibuat seca-

ra kekeluargaan.

Namun tidak dapat dinafikan dalam mencapai matlamat ini, masing-masing memerlukan jati diri dan semangat kejiranan serta setia kawan yang kuat dengan membuang perasaan ego, sombong, menunjuk-nunjuk, bangga diri, mencari kelemahan orang lain, mementingkan diri sendiri dan lain-lain sikap negatif yang tidak membawa faedah kepada mana-mana negara.

Walau apa pun keputusan diambil, sewajarnya ia dibuat dengan berhemah dan bijaksana. Semangat toleransi yang tinggi amat diperlukan dalam mencari kaedah penyelesaian terbaik supaya tidak mengeruhkan lagi keadaan.

Ingatlah, masyarakat dunia sentiasa memandang, memerhati dan menilai sama ada ASEAN, khususnya negara terbabit mampu menangani permasalahan ini secara bijaksana dan dihormati semua.

Dr Che Zuhaida Saari,

Fakulti Syariah dan Undang-Undang, Universiti Sains Islam Malaysia

FORUM

Pembaca yang ingin menyuarakan pandangan berhubung isu semasa boleh menghantar sumbangan menerusi e-mel: bhforum@bharian.com.my